

M301: Athis und Prophlias

1,1 er sach wie sich der helet balt
1,2 sînen vîanden vergalt
1,3 mit verchsêren wunden
1,4 ouch sach er ûz der schrunden
1,5 wie die juncvrouwe entran
1,6 unde wie sie den edelen man
1,7 sîner kleider entnacten
1,8 unde mit löuberem bedakten
1,9 unde wurfen erde ûf in
1,10 unde sach wie sie sluffen
1,11 durch die mûren an daz velt
1,12 daz sie nehein widergelt
1,13 ire mordes dâ entviengen
1,14 unde sach wie sie giengen
1,15 an daz gebirge in den walt
1,16 dô dit der mære helet balt
1,17 allez wole beschouwete
1,18 harte er sich unvröuwete
1,19 des junchêren tôdes
1,20 “daz der mennische sus broede . ist”
1,21 sprach der wole gemuote
1,22 verholene an sînem muote
1,23 “waz sulen wir arme liute
1,24 dirre knappe lebete hiute
1,25 aller sorgen ænic
1,26 unde versach sich harte wênic
1,27 sus getâner zuoversiht
1,28 unde ich unreinez wiht
1,29 stürbe gerne ob ich möhte
1,30 disem edelen kinde töhte
1,31 in der werlt wole zuo lebenne
1,32 wende al sîn dinc stuont ebene
1,33 al lige er nû zuohouwen
1,34 er minnete sîne vrouwen
1,35 in sîneme herzen binnen
1,36 mit getriuwelîchen minnen
1,37 dâ wider minnete sie in
1,38 unde stuont ieweders sin

1,39 wie iz dem andern daz getæte
1,40 des er ganze vröuwede hæte
1,41 dit was ein leben von willeküre
1,42 hie næme ich al die werlt niht vüre
1,43 ob ich solte kiesen
1,44 sus neme ich eine biesen
1,45 vüre mîn leben” sprach Athîs
1,46 “daz ich ie wart alsus wîs
1,47 an der liebe und an der leide
1,48 unde daz ich armer man sie beide
1,49 alsô rehte wole erkenne
1,50 unde daz ich eteswenne
1,51 liebes sô gewaltic was
1,52 dâ mich mîn vriunt Prophiliâs
1,53 alsus verre abe schiet
1,54 der mich hiute erkante niet
1,55 dô er mich sô dürftic sach
1,56 daz mir alles des gebrach
1,57 des ich zuo den êren solte tragen
1,58 daz wil ich iemer gote klagen
1,59 daz ich ie liep zuo liebe erkôs
1,60 und ich iz sô schiere verlôs
1,61 weste ich niht waz liep wære
1,62 sô wære mir unmære
1,63 daz ich mîn liep verloren habe
1,64 dâ mir dit leit ist komen abe
1,65 daz ich hie muoz verenden”
1,66 mit windenten henden
1,67 mit herzeswærenden noeten
1,68 gienc er zuo dem tôten
1,69 unde huop in von der erden
1,70 dô truoc er den werden
1,71 hine zuo sîner schrunden
1,72 dô bluotten ime die wunden
1,73 unde machete den wec rôt
1,74 “wie mac ich iemer mînen tôt
1,75 an ihte baz erwerben
1,76 sît ich doch wil sterben
1,77 denne an diseme kinde”
1,78 gedâhte der swinde
1,79 unde redete iz selbe wider sich
1,80 “disen mort den ziehe ich ûfe mich
1,81 morgene sô man sîn entbiret
1,82 und bî mir vunden wirdet
1,83 sô spreche ich daz ich in habe erslagen
1,84 unde zuo mir in daz hol getragen
1,85 sô wirdet daz volc mich vâhente
1,86 unde sân zuo tôde erslahente

1,87 der tô t ist samfter harte vile
1,88 sît ich ot niht genesen wil
1,89 mit jâmerlîcher pîne
1,90 denne mir die hande mîne
1,91 den tô t selben tæten”
1,92 in disen ungeræten
1,93 lac der helet unde qual
1,94 wen biz der morgen überal
1,95 liuhte . unde die sunne schein
1,96 dô die Rômære überein
1,97 giengen wider und vort
1,98 dô vunt en sie daz bluot dort
1,99 dâ der knappe ermordet wart
1,100 unde volgeten der erslahenten vart
1,101 wen biz zuo der schrunden
1,102 den tô ten sie dâ vunt en
1,103 unde den lebenden dâ bî ligen
1,104 mit den bluote gar besigen
1,105 grôz jâmer sie begiengen
1,106 den lebenden sie viengen
1,107 den tô ten lîchamen
1,108 in einen schilt sie nâmen
1,109 und vrâgeten den lebenden
1,110 dô sie sich verebeneten
1,111 wer den knappen slüege
1,112 und in die schrunden trüege
1,113 “daz hân ich” sprach der helet sân
1,114 “wer hæte iz anders getân
1,115 wende ich bin hier eine”
1,116 sie sprâchen algemeine
1,117 daz würde ime al zuo leide
1,118 dô vuorte man sie beide
1,119 zuo Rôme vûre den dincstuol
1,120 bî deme hâre durch den pfuol
1,121 wart er dicke gezogen
1,122 unde zuo der erden gebogen
1,123 als man in sterben wolte
1,124 wen daz es niht wesen solte
1,125 umbe Rôme was iz sô gestalt
1,126 daz der rîchen gewalt
1,127 über die armen niene gienc
1,128 swenne sô man dâ gevienc
1,129 einen schuldigen an ihte
1,130 sô muoste er vûre daz gerihte
1,131 in torste nieman sterben
1,132 noch neheine wîs verderben
1,133 an guote . noch an lîbe
1,134 an kinde noch an wîbe

1,135 êr danne er vüre daz gerihte quam
1,136 unte der klagære alsam
1,137 ist daz er sich entsagete
1,138 deme der ûf in klagete
1,139 sô wart er ledic gelâzen sân
1,140 hæte er aber sô missetân
1,141 daz vüre in stuont nehein bete
1,142 sô beslôz man in zuo stete
1,143 in eine ketenen die dâ lac
1,144 dâ muoste er unz an den dritten tac
1,145 inne ligen gespannen
1,146 vore wîben . unde vore mannen
1,147 daz al daz volc an ime gesæhe
1,148 von welicher schult sîn veme geschæhe
1,149 sô denne der dritte tac erschein
1,150 sô quam daz volc überein
1,151 zuo Rôme in den vrônen sal
1,152 unde die consule überal
1,153 unde verteilten den haft
1,154 swie denne sîn veme was geschaffet
1,155 die wart dâ bereitet
1,156 daz des niht wart gebeitet
1,157 sus starp dâ manic manige wîs
1,158 in disen ketenen wart Athîs
1,159 gespannen durch gerihte
1,160 zuo der werlte gesiht
1,161 in der lac er mit sorgen
1,162 unz an den dritten morgen
1,163 dô der dritte morgen quam
1,164 unde die naht abe nam
1,165 daz volc al zuo hove gienc
1,166 ein iegelich consul der bevienc
1,167 einen stuol den er urborete
1,168 Athîsen man dô vuorte

2,1 iren lîp solte slîzen
2,2 den sie mit werden vlîzen
2,3 erzogen hæte unz an den tac
2,4 sie rou daz sie sîn ie gepflac
2,5 mit sô getânen vlîzen
2,6 sît sie zuo langen wîzen
2,7 mit Bilâse solte wesen
2,8 mit deme sie wânte niht genesen
2,9 des wart ir harte leide
2,10 “ô wê mir dirre scheide
2,11 der ich mich von Athîse
2,12 mîneme lieben amîse
2,13 durch Bilâsen scheiden sol”

2,14 ire lûter ougen wurden vol
2,15 vile jâmeriger trehene
2,16 die wâren an zuo sehenne
2,17 swâ man sie vant behangen
2,18 an den wole getânen wangen
2,19 von der rôsen durchschîne
2,20 gevar alse rubîne
2,21 von der wîze gelîch berillen
2,22 sie konden niht gestillen
2,23 wente trân vlôz nâch trâne
2,24 wente sie was vrôuweden âne
2,25 vol jâmers unde riuwen
2,26 von den ganzen triuwen
2,27 ires vile lieben vriundes
2,28 daz nider teil ires mundes
2,29 daz gar von minnenviure wiel
2,30 ir alsô zartlîche entviel
2,31 alsô ob sie zürnen solte
2,32 swie gerne sie aber wolte
2,33 zürnen sie ne konde
2,34 daz ober teil begonde
2,35 ein wênic ûf zuo diezenne
2,36 iren rôten munt ze entsliezenne
2,37 daz man der zende ein wênic sach
2,38 sie leit ot michel ungemach
2,39 unde was dâ bî sô minnesam
2,40 daz sie dem bezzisten wole entzam
2,41 der dô des ertrîches wîelt
2,42 den lîp sie kûme behielt
2,43 von den senenden sorgen
2,44 die sie truoc verborgen
2,45 umbe den helet reinen
2,46 Evas ersach ire weinen
2,47 unde begonde in erbarmen
2,48 er besweif sie mit den armen
2,49 unde ersiuftete vile tiefen
2,50 sîn ougen ime über liefen
2,51 unde bat sie swîgen stille
2,52 er sach wole daz ire wille
2,53 an den küninc niene stuont
2,54 er tet ot sô sie alle tuont
2,55 die dâ leisten wollent triuwe
2,56 er liez sie haben ire ruowe
2,57 unde schiet sich von der megede
2,58 unde gienc schaffen umbe ire getregede
2,59 daz ir niuwet des gebrach
2,60 des im ieman vore gesprach
2,61 Prophiliâs unde Cardiones

2,62 unde ire muoter under des
2,63 mit Gâiten beliben
2,64 ire jâmer sie vertriben
2,65 mit vröuwede gebente trôste
2,66 daz sie doch sêr lôste
2,67 ûz iren senenden riuwen
2,68 ire bruoder sprach in triuwen
2,69 daz er sie wolte loesen
2,70 oder sich alsô verbôsen
2,71 daz er es niemer mêre
2,72 weder an sîn êre
2,73 quæme . noch an sîne maht
2,74 in disen dingen wart iz naht
2,75 unde giengen die liute slâfen
2,76 dô griffen sie zuo den wâfen
2,77 Athîs unde Prophiliâs
2,78 unde allez daz zuo Rôme was
2,79 daz ot zuo wâfen tohte
2,80 unde sich bereiten mohte
2,81 daz bereitte sich gare
2,82 unde quam gemeinlîchen dare
2,83 vûre die stat an ein gras
2,84 dâ ire samenunge was
2,85 ûf einer wîsen vore ein holz
2,86 dar quam manic ritter stolz
2,87 unde manic helet vermezzen
2,88 als daz volc was gesezzen
2,89 in bûrgen dorfen . unde steten
2,90 Evases tochter beretten
2,91 Gâiten alsô quam iz dare
2,92 dô schuofen sie ire schare
2,93 dô sie zuosamene quâmen
2,94 die rede gar vernâmen
2,95 nâch der wîsen râte
2,96 unde tâten daz vile drâte
2,97 sie liezen Athîsen
2,98 ûfe die strâze wîsen
2,99 unde gâben ime Tarquînen
2,100 mit allen den sînen
2,101 Margwêten . Julîn . Julium
2,102 Androinem . unde Grâcûm
2,103 dâr zuo sehs hundert
2,104 rittere ûzgesundert
2,105 ûz allen den bezzisten
2,106 die sie in den landen westen
2,107 ob sie mit Gâiten
2,108 wolten ab entrîten
2,109 unde dise sie ane quæmen

2,110 daz sie die maget in næmen
2,111 ob sie die vüre gevazzeten
2,112 Dîonîsen sie sazten
2,113 mit tûsent halsbergen
2,114 an die huote vore den bergen
2,115 rehtenhalp des küniges hers
2,116 daz er die stîge des mers
2,117 werte mit den sînen
2,118 sie sazten Pâlatînen
2,119 der oeheim was Gâîten
2,120 zuo der lerzen sîten
2,121 mit ahte hundert mannen
2,122 ob sie die maget dannen
2,123 vüre sie zuo schiffe vuorten
2,124 daz sie schilde urboreten
2,125 unde wîges sie gesateten
2,126 dise drî schare sie bestateten
2,127 in telren unde in holzen
2,128 sie hæten manigen stolzen
2,129 ritter unde manigen helet
2,130 zuo vehtenne vile ûz gewelet
2,131 dâ iz zuo vehtenne geriet
2,132 die gesameneten diet
2,133 die niht orse hâten
2,134 ire stat doch wole vertrâten
2,135 unde ire werc wole torsten nützen
2,136 sarjande unde ouch schützen
2,137 die sazten die wîsen
2,138 daz sie durch Athîsen
2,139 beidenthalp des vanen striten
2,140 vore den sarjanden riten
2,141 tûsent ritter in einer schare
2,142 mit verdakten orsen îsenware
2,143 die leitten zwêne vürsten
2,144 die wole werben getorsten
2,145 umbe den werltlichen prîs
2,146 daz was Marques unde Engrîs
2,147 zwêne heledê ûzerkoren
2,148 unde wâren von Rôme geboren
2,149 von küniges geslehte
2,150 unde solten von lêhenrechte
2,151 vore den vanen rîten
2,152 unde zuo dem êrsten strîten
2,153 nâch der schare gienc der vane
2,154 dâ sie houbeteten ane
2,155 sô sie riten in den strît
2,156 daz was ein rôter samît
2,157 gezieret niht zuo swache

2,158 ein ûf gerihtet trache
2,159 als er iezuo vliegen solte
2,160 von gespunneneme golde
2,161 meisterliche dâr in geweben
2,162 der hangete dâ beneben
2,163 gehaft in eine stangen
2,164 dar er mohte gelangen
2,165 unde die in mohte vertragen
2,166 mit îserne wole beslagen
2,167 unde stuont ûf eineme karren
2,168 den zugen zwêne varren

3,1 unde wolte in haben durchstochen
3,2 sînen lieben mâc gerochen
3,3 des dâhte er ime vile angen
3,4 unde bôt sich gevangen
3,5 daz er in niht en stæche
3,6 êr danne der küninc gespræche
3,7 Prophiliâs hiez in sichern
3,8 er hæte eine kichern
3,9 genomen vüre Salerne
3,10 er sprach “daz tuon ich gerne”
3,11 unde sicherte ime an sîne hant
3,12 den helm man ime abe bant
3,13 der küninc was dâr under
3,14 daz dunket mich niht wunder
3,15 wibelval als ein asche
3,16 zuo sîneme harnasche
3,17 hiez er varen beide
3,18 unde saz ûf anderweide
3,19 dô quâmen sîne knappen
3,20 unde ebeneten sîne wâpen
3,21 in vile kurzen stunten
3,22 sîn houbet sie im bunden
3,23 den schilt langeten sie dare
3,24 der was von lâsûre gare
3,25 sô daz niht bezzers mohte sîn
3,26 dâ was vile meisterlichen in
3,27 von bernischen golde ein arn
3,28 als er in die luft wolte varn
3,29 gemâlet unde entworfen
3,30 der hæte sich zuoworfen
3,31 mit den vetachen beiden
3,32 mit zwisgolde unterscheiden
3,33 an liden unde an vederen
3,34 ouch hæte er ietwederen
3,35 vore bî deme lîbe hine
3,36 daz der zagel dâ durch schine

3,37 ûf den schilt gestrecket
3,38 die klâwen wole zuorecket
3,39 einen wâfenroc er vuorte
3,40 der an die waden ruorte
3,41 von brûneme samîte
3,42 gesniten von guoter wîte
3,43 als er in tragen wolte
3,44 von gespunneneme golde
3,45 arne genuoc dâr in geweben
3,46 vorne . hindene . beneben
3,47 an gêren unde an sîten
3,48 man sach in zuo den zîten
3,49 einen halsberc ane vüeren
3,50 mit riemen unde mit snüeren
3,51 gestricket zuo den meilen
3,52 an der sîner vintailen
3,53 daz sie sich mohten niht entloesen
3,54 unde zwô silberwîzen hosen
3,55 gestricket umbe sîne bein
3,56 unde ein helm der verre schein
3,57 von spiegelbrûnen stâle
3,58 mit manigem goltmâle
3,59 die sich dâ verre wîseten
3,60 gezieret an den lîsten
3,61 unde an dem barbiere
3,62 eine rîche baniere
3,63 vuorte er an sîner hant
3,64 die was verre bekant
3,65 nâch sînen schilden gesniten
3,66 ein guot marc hæte er beschriften
3,67 verdaht mit zwein decken
3,68 ein swert mit ganzer eggen
3,69 daz sêre mohte snîden .
3,70 vuorte er an sîner sîten
3,71 unde reit ûz an daz hôheste
3,72 er warp nâch einer joste
3,73 mit mannelîcher pîne
3,74 ime volgeten die sîne
3,75 mit mannelîchen gebærdem
3,76 daz vröuwete den werden
3,77 von Messîne Margôz
3,78 mit einer storîen die was grôz
3,79 quam in den bûhurt gevarn
3,80 er sach anderthalp den arn
3,81 von eineme schafte wadelen
3,82 daz erwegete den edelen
3,83 an einen mannelîchen nît
3,84 er reit ein schoene râvît

3,85 verre swarzer danne ein kole
3,86 unde was gewâfenet wole
3,87 dâ mite sî die rede verant
3,88 ein sper vuorte er an der hant
3,89 ein zeichen von rîcher habe
3,90 verre wandelte dâr abe .
3,91 unde ersprangte durch Bîlâsen
3,92 ûf Prophiliâsen
3,93 mit ûf gerihter banier
3,94 “Messîne schevalier”
3,95 rief er dô er ersprangte
3,96 Prophiliâs ouch verhangte
3,97 sîneme orse vile drâte
3,98 ein starc sper er hâte
3,99 geslagen under sînen arm
3,100 die meilen wâren worden warm
3,101 deme küenen jungelinge
3,102 unde stach in durch die ringe
3,103 vore deme schilde in den bûch
3,104 unde warf in tôt in einen strûch
3,105 daz sper dannoch ganz beleip
3,106 daz ors er vort mit sporen treip
3,107 unde vuor in allen bevorn
3,108 er hæte in ander sît erkoren
3,109 den helet Dîonîsen
3,110 wâ ime daz sperîsen
3,111 steckete in der sîten
3,112 unde sach sie starke strîten
3,113 des hers in beiden enden
3,114 daz volc vaste swenden
3,115 die beidenthalp sich werten
3,116 mit spern unde mit swerten
3,117 die vile dicke besuffen
3,118 den orsen in den goffen
3,119 unde in den küenen liuten
3,120 Athîs ot sîne trûten
3,121 Rôme vile schadelîche erwarp
3,122 wende ir vile dâr umbe erstarp
3,123 Prophiliâs der gehêrte
3,124 über Dîonîsen kêrte
3,125 des vile maniger entgalt
3,126 unde beschûtete mit gewalt
3,127 den küenen Dîonîsen
3,128 des lobeten in die wîsen
3,129 sie hæten in ûz den vriunden
3,130 wunt unde ungesunden
3,131 under den Rômæren zuo trôste
3,132 den vienc er . unde lôste

3,133 Dîonîsen sînen mâc
3,134 er was an tugenden niht trâc
3,135 dô er den herzogen vienc
3,136 soliche tât er dâ begienc
3,137 wente der strît der was hart
3,138 daz er dâ von sô müede wart
3,139 von den manicvalten slegen
3,140 daz er sich mohte niht geregen
3,141 unde reit ûz ruowen von disen
3,142 under boume an eine wisen
3,143 an ein wünniclîchez gras
3,144 daz genuoc nâhe deme strîte was
3,145 wen biz ire ors verbliesen
3,146 er sprach “wir sulen hie sîn
3,147 uns ruowen eine wîle
3,148 ob der küninc von Bîle
3,149 mit aller maht puniere
3,150 daz wir mîne baniere
3,151 kêren im zuogegene
3,152 besehet iuch allerwegene
3,153 ob ir noch Athîses
3,154 mînes lieben amîses
3,155 iergen werdet geware”
3,156 dô übersâhen sie die schare
3,157 durch ein weterdünnez loup
3,158 unde ersâhen grôzen stoup
3,159 von Athîse ûfe stieben
3,160 unde begonden ime lieben
3,161 sie sprâchen “jenez ist Athîs
3,162 unde hât erworben den prîs
3,163 er ist die vîande ane komen
3,164 unde hât Gâite genomen
3,165 daz ist uns wole an muote”
3,166 des vröuwete sich der guote
3,167 dô sande er Androcheum
3,168 den consul Anthichêum

4,1 Bîlâs dâ von Bîle
4,2 was ouch al die wîle
4,3 von der erden ûf gesprungen
4,4 zuosamene sie drungen
4,5 mîn hêrr Athîs unde Bîlâs
4,6 Alexander unde Kôlibâs
4,7 Dîens unde Dôrîlâus
4,8 Walfaram Kôrillâus
4,9 unde der küene Pandarôn
4,10 der herzoge von Kôrillôn
4,11 zuo der erden von ire veizeten

4,12 orsen vile drâte erbeizten
4,13 mit allen ire geverten
4,14 daz sie den küninc werten
4,15 Athîs unde Grâciûs
4,16 Androines unde Julius
4,17 Lucegwie und Florentînus
4,18 Antonius unde Latînus
4,19 mit allen iren gesellen
4,20 durch ire baldez ellen
4,21 den küninc zuo vuoze bestuonten
4,22 dô giengen die wole tuonten
4,23 unde truogen ire baniere
4,24 dâ vogeles unde tiere
4,25 wâren beide in gesniten
4,26 als mannelîch truoc nâch sînen siten
4,27 vaste an einander
4,28 Kôlibâs unde Alexander
4,29 mit allen den die sie hâten
4,30 Bîlâsen gâhes vertrâten
4,31 unde stateten des neheine wîs
4,32 daz der küninc unde Athîs
4,33 entsament vuhten einen wîc
4,34 sie erkanten wole ire beider krîc
4,35 daz sie gevêch wâren
4,36 unde nôte sich verbâren
4,37 des torsten sie ez niht wâgen
4,38 die Bîlâses pflâgen
4,39 vore sînes lîbes vorhte
4,40 wende Athîs wunder worhte
4,41 des tages an sîner ritterschaft
4,42 er hæte manheit und kraft
4,43 an lîbe unde an sinnen
4,44 ouch half im kraft der minnen
4,45 daz er getürstelîchen streit
4,46 mit sorcsamer arbeit
4,47 die nôtvesten giengen
4,48 unde gâben unde entviengen
4,49 manigen smerzenten stich
4,50 dâ von in beidenthalben sich
4,51 der küenen schade gemêrte
4,52 ir nehein dâ verherete
4,53 dem andern zuo slânne
4,54 ir nehein zuo vâhenne
4,55 des andern dâ gerte
4,56 dâ gienc swert gegen swerte
4,57 slac gienc gegen slage
4,58 wen biz sich zuo dem mitten tage
4,59 die sunne begonde neigen

4,60 unde sich die waleveigen
4,61 beidenthalben ûz gelâsen
4,62 sie vuhten an Bîlâsen
4,63 mit hazlîcheme zorne
4,64 Bîlâs der ûzerkorene
4,65 stuont in manlîchen vore
4,66 den schilt truoc er enbore
4,67 verre vore den handen
4,68 er stuont in den gewâneden
4,69 dô er niht mohte gesigen
4,70 daz er wolte dâ beligen
4,71 unde er niht genesen wolte
4,72 des vaht der êren holde
4,73 in heledes gebâerden
4,74 unde tungete die erden
4,75 mit rêveigen bluote
4,76 sînes lîbes âne huote
4,77 dannoch stuont des küninges vane
4,78 dâ sie houbeteten ane
4,79 des pflac der helet Absterne
4,80 der küninc von Pâlerne
4,81 unde Dimothênes der degen
4,82 sie sâhen harte ungewegen
4,83 den strît ires hêrren halben wesen
4,84 unte daz er mohte niht genesen
4,85 swaz er in gæbe sîner habe
4,86 sie nie hulfen ime dâr abe
4,87 unde sâhen den küninc in noeten stân
4,88 unde manigen nîtslac slân
4,89 unde degentlîchen strîten
4,90 unde sâhen in ander sîten
4,91 halten eine grôze schare
4,92 mit verdakten orsen îsenware
4,93 die der karroschen pflâgen
4,94 unde ire lîp wole torsten wâgen
4,95 durch den werltlîchen prîs
4,96 der pflac Marques unde Engrîs
4,97 die ersach Absterne
4,98 dô hæte er vile gerne
4,99 Bîlâsen von deme strîte brâht
4,100 in mannelîcher andâht
4,101 in den bûhurt er ruorte
4,102 ein starc sper er vuorte
4,103 Brînus den küninc ersach
4,104 dâ er durch die schare brach
4,105 unde rante in manlîchen ane
4,106 er reit ein ors wîz als ein swane
4,107 daz was snel unde starc

4,108 mit deme schilde er sich barc
4,109 dô er den küninc hæte erkoren
4,110 daz ors nam er mit den sporen
4,111 daz in vile snellîchen truoc
4,112 under daz uohse er daz sper sluoc
4,113 daz selbe tet Absterne
4,114 wende er was ein kerne
4,115 zuo tuonne werde ritterschaft
4,116 an den hals er in traf
4,117 dâ er in velligen wiste
4,118 Brînus der vermissete
4,119 Absterne was von grôzer kraft
4,120 er sach den eschînen schaft
4,121 daz er sich von kreften bouc
4,122 unde Brînus von dem orse vlouc
4,123 unde er wunt viel ûf den sant
4,124 daz ors nam er an die hant
4,125 Bîlâse er iz brâhte
4,126 des nôt er vore bedâhte
4,127 wende er vile triuwen hâte
4,128 “wole ûf” sprach er vile drâte
4,129 “unde wartet war ir wellet
4,130 sich hât sêre missestellet
4,131 daz volc in deme strîte” “nein
4,132 â helet nû bîte
4,133 noch eine kleine wîle”
4,134 sprach der küninc von Bîle
4,135 “daz volc von eineme schricke
4,136 verzaget harte dicke
4,137 unde erschamet sich vore leide
4,138 unde ermannet anderweide
4,139 unde strîtet danne baz danne êr
4,140 swenne der helet wirdet sêr
4,141 sô ermannet er von den wunden
4,142 unde gesiget under stunten
4,143 daz selbe mac uns hie geschehen
4,144 daz solt dû helet ane sehen”
4,145 “nein” sprach der ander degen
4,146 “der strît ist als ungewegen
4,147 daz ir niht gesigen müget
4,148 liebe hêrre des gehüget
4,149 unde lâzet iuch niht toeten
4,150 sich sol in sînen noeten
4,151 der helet wole versinnen
4,152 in gelücke unde in gewinnen
4,153 dunkent alle liute wîs
4,154 daz ist ein lobelîcher prîs
4,155 swenne iz dem manne missegât

4,156 daz er sich danne wole gehât
4,157 unde sich stellet dâr engegen
4,158 als im sîn dinc ist gelegen”
4,159 sprach der helet mære
4,160 “iu sint die Rômære
4,161 alsô wole gesezzen
4,162 wollt ir es niht vergezzen
4,163 unde wollt iz dâr nâch handeln
4,164 daz sie iu müezen wandeln
4,165 swaz sie iu lasters habent erboten
4,166 ouch gelobe ich iu bî unsen goten
4,167 wollt ir mîn dienst dâr zuo
4,168 daz ich ez deste gerner tuo”

5,1 unde schuofen dâr daz dienst
5,2 nû dit al geschên ist
5,3 unde der mitter tac zuogienc
5,4 unde die küelde ane gevienc
5,5 dô wart der maget Gâite
5,6 gegen der hôchgezite
5,7 gekleidet sô nie maget baz
5,8 an iren briutestuol gesaz
5,9 daz hæte ire vater vore bedâht
5,10 ir aller pfert wâren brâht
5,11 in den hov durch rîten
5,12 dô huop man ûf Gâiten
5,13 Evas nam sie an die hant
5,14 unde Cardionem zuohant
5,15 Athîs ire reitgeselle was
5,16 dâr nâch reit Prophiliâs
5,17 unde sîn muoter Sâlustîne
5,18 dâr nâch al die sîne
5,19 dâr nâch die vrouwen von der stat
5,20 der iegelich hæte sich gegatet
5,21 zuo deme der ir ebene quam
5,22 unde ir zuo dieneste gezam
5,23 vile videlære quâmen
5,24 die dâ wole gezâmen
5,25 unde videlten vile suoze
5,26 in muoziclicher muoze
5,27 sô riten sie genuoc trâge
5,28 gegen der wurmlâge
5,29 wende der wec was kurz
5,30 vore ime erhuop sich der bûhurt
5,31 von allen den jungen rittern
5,32 die macheten manige splittern
5,33 ûz den wîznîuwen scheften
5,34 swâ sie den schaft behaften

5,35 ûfe die vrischen schilde
5,36 daz ist uns noch ein bilede
5,37 unde ein geziuc der êlîchheit
5,38 vile manic ritter gemeit
5,39 quam zuo deme bûhurde
5,40 ich wæne den wole würde
5,41 gewartet von den vrouwen
5,42 got lâze in wole gezouwen
5,43 daz sie ez müezen sô begên
5,44 daz sie zuo lobe dâr abe stên
5,45 nû wart zuo Rôme ein spil gedâht
5,46 daz wart des tages vollenbrâht
5,47 durch den werltlîchen ruom
5,48 swenne ein wert briutegoume
5,49 mit sîner brût zuo hove reit
5,50 sô was des dâ gewonheit
5,51 daz alle junge liute
5,52 witewen . megede briute
5,53 den soliche spil gezâmen
5,54 danne zuosamene quâmen
5,55 unde sich bî handen viengen
5,56 unde vûre die brût giengen
5,57 ir iegelich nâch ire ehte
5,58 sô sie geleisten mehte
5,59 hæte ire dinc dâ gesazt
5,60 unde sich mit kleidern ûz gevazzet
5,61 von rîchen rocken wole gesniten
5,62 nâch den franzischen siten
5,63 vile ebene an sich geschurzt
5,64 unde zuo der erden gekurzt
5,65 ire arme sûbere vernât
5,66 sô die werlt noch site hât
5,67 mit guoten gûrtelen langen
5,68 beslagen mit goltspangen
5,69 mit tiuren vûrespanen
5,70 dô sie giengen dannen
5,71 in hôhe gerenten muote
5,72 truogen si ûf ire hûete
5,73 daz sie niene verblichen
5,74 ire hantschen an gestrichen
5,75 und ebene sich gestellet
5,76 sus giengen sie gesellet
5,77 wen biz sie dar quâmen
5,78 dâr sie die brût vernâmen
5,79 dâ sâzen sie unde beitten
5,80 wen biz sie sich bereitten
5,81 mit zuhtlîchen gelâzen
5,82 sô sie danne ûf gesâzen

5,83 sô erhuoben die werden
5,84 vore der briute pferden
5,85 ein spil daz was ein linde hût
5,86 über ein weich hâr gesût
5,87 als ein kûle alsô grôz
5,88 disen handeweichen klôz
5,89 den wurfen sie einander
5,90 swelich ir dâ was gerander
5,91 unde sneller danne die andern
5,92 sô sie begonden wandern
5,93 die behielt dâ den schal
5,94 dit spil was geheizen bal
5,95 in roemischer zungen
5,96 sus giengen die jungen
5,97 hupfente unde springente
5,98 von den briuten singente
5,99 einander werfente den bal
5,100 der an spile niht ruowen sal
5,101 vüre daz tÊmpel der gotinne
5,102 die vrouwe ist über die minne
5,103 die was dô Venus genant
5,104 sô quam ire êwart zuohant
5,105 ein man alter unde grîs
5,106 der segenete sie sîne wîs
5,107 unde gap sie mit worten
5,108 die dâr zuo gehôrten
5,109 zuosamene zuo rehter ê
5,110 sô tâten aber dise als êr
5,111 biz zuo den herbergen wider
5,112 sô sie danne erbeizten nider
5,113 sô gap man in ir beider
5,114 ire ors . ire pfert . ire kleider
5,115 unde swaz sie zierden vuorten ane
5,116 dâ mite huoben sie sich danne
5,117 ûfe den hov vrônen
5,118 dâ tanzeten die schoenen
5,119 jungen vrouwen inne
5,120 ze êren der gotinne
5,121 dit wâren heidenische site
5,122 hie wart gecondewieret mite
5,123 Athîs unde Gâîte
5,124 sô nie vore der gezîte
5,125 juncvrouwe wæne ich würde
5,126 mit spile unde mit bûhurde
5,127 mit zühtigern gelâzen
5,128 zuo hove unde zuo strâzen
5,129 gevüeret wart êrsamer
5,130 dâ was vröuwede âne jâmer

5,131 waz touc ein umbekreizen
5,132 die vrouwen al erbeizten
5,133 besundern vore der porten
5,134 die in dâ zuo gehôrten
5,135 die vuorten die pfert hine
5,136 unde die rittere zuoze in
5,137 daz manigen wart zuo pînen
5,138 ir iegelich nam die sînen
5,139 unde vuorte sie vile schône
5,140 dâ der tisch vrône
5,141 Gâîten bereitet was
5,142 dô hiez ire vater Evas
5,143 den vrouwen geben wazzer
5,144 Athîs dâ niht vergaz ir
5,145 unde trat zuo Gâîten
5,146 ebene an ire sîten
5,147 mit zühtigen gelâzen
5,148 sie sâzen nider unde âzen
5,149 man gap in alles des genuoc
5,150 des daz ertrîche truoc
5,151 dâ mite sî die rede verant
5,152 vile kerzen wart dâ ûf gebrant
5,153 dô man des âbendes entsuop
5,154 einen tanz man ane huop
5,155 durch daz die muottrûeben
5,156 die gerne jâmer üeben
5,157 vröuwede dâ entviengen
5,158 vile videlære giengen
5,159 unde videlten vile süeze noten
5,160 dâ wart vile dienestes erboten
5,161 den wole getânen vrouwen
5,162 die ambahtliute erzouwen
5,163 die ir ware dâ nâmen
5,164 sie âzen gâhes unde quâmen
5,165 dô der tanz sich verliez
5,166 trinken man brengen hiez
5,167 den wîrten unde den gesten
5,168 dô vuorten sie die bezzisten

6,1 vile vrouwen mit vile mannen
6,2 mit grôzen vröuweden dannen
6,3 dâ ire bette was bereitet
6,4 daz volc niht langer beitet
6,5 unde liez sich niuwet strâfen
6,6 swaz dâ niht solte slâfen
6,7 daz nam urloup unde gienc
6,8 die brût ire dinc ane vienc
6,9 vile gezogenlîche

6,10 hêrr Evas der rîche
6,11 bevalch die maget Athîse
6,12 dô schiet sich der grîse
6,13 von der wole getânen maget
6,14 waz sol dâ mêr von gesaget
6,15 ist daz ich vûrder sagete
6,16 dem volke iz missehagete
6,17 unde begonde es erlangen
6,18 Gâite die wart begangen
6,19 sô nie kint von kûninges art
6,20 êrsamer hie begangen wart
6,21 dâr ane lât iu genüegen
6,22 Athîs mit schoenen vuogen
6,23 legete sich zuo dem êrsten nider
6,24 Gâite ein wênic streit dâ wider
6,25 daz en dunket mich niht wunder
6,26 dâ was verborgen under
6,27 des mannes vorhte kindes schame
6,28 ez ist ein grôz dinc mannes name
6,29 ein solich dinc zuo geschehende
6,30 daz ein maget zuo sehende
6,31 den liuten . tritet an die stat
6,32 dâr nie ire vuoz an getrat
6,33 swie liep sie den man habe
6,34 die schame wîset sie dâr abe
6,35 daz sie ez bloedelîchen tuo
6,36 Sâlustîne sprach ir zuo
6,37 unde hiez sie sich kleiden
6,38 Prophiliâs gap in beiden
6,39 guote naht unde gienc dâr vûre
6,40 ein vrouwe beslôz die tûre
6,41 unde entkleideten sie under des
6,42 Sâlustîne unde Cardiones
6,43 nâmen Gâiten mit gewalt
6,44 unde legeten si an den helet balt
6,45 vile vroelîchen er sie entvienc
6,46 sie nam urloup unde gienc
6,47 unde die vrouwen alzuogater
6,48 unde legete sich bî iren vater
6,49 den biderben Evasen
6,50 neben Prophiliâsen
6,51 legete sich Cardiones
6,52 vûrder tar ich niht sprechen wes
6,53 sie begonden oder tæten
6,54 grôzen schal sie hæten
6,55 ire vriunde und ire mâge
6,56 in der wurmlâge
6,57 wen biz sie sich gevrôuweten genuoge

6,58 unde man trinken dar getruoc
6,59 dô schieden sie sich alle
6,60 unde vuoren danne mit schalle
6,61 dâr sie zuo tuonne hâten
6,62 vile wahtære ûf trâten
6,63 unde bewarten sie vore den dieben
6,64 sehet dise zwei gelieben
6,65 bî einander lâgen
6,66 vile vröuweden pflâgen
6,67 alsô mannelîch wole wizen mac
6,68 dô liep bî liebe gelac
6,69 und er ez an sînen arm genam
6,70 waz dâ vröuweden abe quam
6,71 vröuwede gerenten sinnen
6,72 ist daz ime von der minnen
6,73 ie sichein ungemach
6,74 an sîneme lîbe geschach
6,75 dô er Cardionem verkôs
6,76 unde sîn erbe verlôs
6,77 des in die minne entsazte
6,78 wie wole sie es in ergatzte
6,79 mit der schoenen Gâiten
6,80 die sie bî sîner sîten
6,81 mit grôzen noeten hæte brâht
6,82 er hæte es anders gedâht
6,83 küninc Bîlâs dô er sie nam
6,84 die sælde was ime gram
6,85 unde gonde ir baz Athîse
6,86 den sie an ritters prîse
6,87 gehoeht hæte sêre
6,88 waz solte der rede mêre
6,89 Athîs bî Gâiten lac
6,90 wen biz verre ûf den tac
6,91 unde daz die sunne schein
6,92 die wîle die Rômær über ein
6,93 zuo den betehûsen riten
6,94 ire gote umbe ire hulde biten
6,95 dô wâren ouch dise erwachet
6,96 unde hæten sich ûf gemachet
6,97 in muozelîcher muoze
6,98 mit manigen senften gruoze
6,99 schiet sich Athîs dannen
6,100 und gienc zuo den mannen
6,101 dâ der allermeiste was
6,102 dô vuorte in Prophiliâs
6,103 dâ er sich solte kleiden
6,104 man hæte in gelîche beiden
6,105 gewonnen kleider harte guot

6,106 dô sie hæten sich geschuohet
6,107 unde ire ermeln vernæjeten
6,108 unde sich gevangen hæten
6,109 ûf ire pfert sie sâzen
6,110 mit schoenen gelâzen
6,111 hie möhte ich vile abe sagen
6,112 wie sîn gesmîde was betragen
6,113 mit rôten gebranten golde
6,114 ob ich ez niht kürzen solte
6,115 sie riten mit ire vriunden
6,116 dâ sie daz tĒmpel vuntun
6,117 Veneris der gotinne
6,118 die vrouwe ist über die minne
6,119 dô man ire reht in dâ getete
6,120 unde sie zwêne an ire gebete
6,121 gewâren mit ire mâgen
6,122 wen biz sie es genuoc gepflâgen
6,123 dô riten sie ungebeitet
6,124 dâ daz gestüele was bereitet
6,125 mit schoenen bûhurde wider
6,126 dâ legen wir die rede nider
6,127 Sâlustîne unde Cardiones
6,128 wâren ouch komen under des
6,129 unde heimelîche liute
6,130 unde hulpen ûf der briute
6,131 ire kleider tâten sie ir ane
6,132 unde vuorten sie danne
6,133 in ein ander paveliûn
6,134 ein pfellel viôlinbrûn
6,135 von golde tier dâr in gewebe
6,136 löuber zwîge wînreben
6,137 unde wæhe gevlohten stricke
6,138 underworht vile dicke
6,139 mit golde deme rôten
6,140 dâr abe was erschrôten
6,141 ein mandel wole mit sinnen
6,142 bezogen wole enbinnen
6,143 mit hermînen vederen
6,144 an dem orte ietwederen
6,145 nidene zuo gedecket
6,146 unde obene vûre gestreckt
6,147 ein brûn zobel zuo mâzen rûch
6,148 als er wart in einer drûch
6,149 gevangen dâr zuo Riuzen
6,150 zwei tassel enbûzen
6,151 von golde wâren gesmidet
6,152 unde wie zuosamene gelidet
6,153 mit guoten steinen undersatzt

6,154 alse sie vile tiure geschätzt
6,155 dô wurden von den wîsen
6,156 die guot wole konden prîsen
6,157 unde ahte wisten werkes
6,158 unde des selben gemerkes
6,159 was ein roc ir gesniten
6,160 nâch den franzoischen siten
6,161 weder zuo lanc . noch zuo kurz
6,162 dâ hæte sie sich in gegurt
6,163 mit einen beslagenen borten
6,164 enmitten unde zuo den orten
6,165 mit kleinen goltspangen
6,166 gevüegen niht zuo langen
6,167 von golde ein vürespan harte wole
6,168 gesmidet unde edeler steine vol

7,1 daz im arges niht geschach .
7,2 Gâite dit wole gesach .
7,3 daz hêrr Pêrithêus was
7,4 sô gevallen ûf daz gras
7,5 daz er von unmehten
7,6 lac in swachen ehten
7,7 als ob er wære tôt geslagen
7,8 und begonde in leitlîchen klagen
7,9 wider Cardionesen
7,10 “ze wære sol dit wâr wesen
7,11 umbe sînen tôtval”
7,12 sprach die stat überal
7,13 “sô wirdet entworht Athêne
7,14 sie wurben ez wole . sie zwêne
7,15 küninc Karsidôrus . und er
7,16 unde sol des nû niht wesen mêr
7,17 daz Pêrithêus ist erslagen
7,18 wer sol die last uns helfen tragen”
7,19 die vrouwen die dâ sâzen
7,20 an venstern . an terrâzen
7,21 die wurden des valles gewar
7,22 und verswigen . in . doch gar
7,23 beide swester unde die muoter
7,24 Karsidôrus was ein guoter
7,25 daz tet er dicke wole schîn
7,26 er liez alle rede sîn
7,27 und erbeizte ûf den sant
7,28 den helm er im abe bant
7,29 same tet er die vintelen
7,30 dô vant er in von den meilen
7,31 zerquetzet . ane dem antlitze
7,32 same vant er in âne witze

7,33 dâ ligente an deme sande
7,34 daz er vuoze noch hande
7,35 regete noch daz houbet
7,36 alsô was er betoubet
7,37 Karsidôrus sprach im zuo
7,38 “Pêrithêus wie vers dû
7,39 sprich mir zuo . lieber vriunt”
7,40 dô regete er den munt
7,41 und warf ûf di ougen trâge
7,42 gein des küniges vrâge
7,43 “waz ist an mir ergangen
7,44 bin ich .” sprach er . “gevangen
7,45 hân ich gesichert .” “nein dû niet”
7,46 sprach er . “sô ne ist mir niht geschiet
7,47 wende daz ich orses niht ne hân”
7,48 und spranc ûf von der erden sân
7,49 “hie stêt” sprach er “dîn selbes ors
7,50 daz dir der küninc Laumacors
7,51 liez . dô dû den stæche nider”
7,52 dô gienc er zuo dem orse wider
7,53 mit vroelichen gebærden
7,54 dô gesach er die werden
7,55 vrouwen . über ime sitzen
7,56 sînes linken vuozes spitzen
7,57 sazte er . in den stegereif
7,58 mit den handen er begreif
7,59 beidenthalp . die satelbogen
7,60 und quam ûf sîn ors gevlogen
7,61 reht als ein vogel wilde
7,62 dô greif er nâch deme schilde
7,63 den helm den hiez er binden
7,64 und bat im gâhes ervinden
7,65 waz dort sîn vater tæte
7,66 der in verriten hæte
7,67 mit vriunden unde mit mannen
7,68 daz sie in niht vuorten dannen
7,69 ouch pungierte Phêdrîâs
7,70 Athîs und Prophiliâs
7,71 durch werder êren bejac
7,72 all die wîle daz er lac
7,73 unwizzende an deme sande
7,74 manigem schildes rande
7,75 wart ire puneiz zuo leide
7,76 die nôtgestallen beide
7,77 Prophiliâs und Athîs
7,78 wurden werbente umbe den prîs
7,79 und wurden soliche ritterschaft .
7,80 tuonte . daz . dâ niht zuo getraf

7,81 Sâlustîn der vuorte
7,82 den vanen und ruorte
7,83 manlîchen . in die dicken
7,84 daz ime mohte ersticken
7,85 sîn ors von gedrange
7,86 mit bitteren antvange
7,87 wart er entvungen dicke
7,88 daz was im als ein wicke
7,89 wende er was wîs unde starc
7,90 mit deme schilde er sich barc
7,91 und hielt ot vaste den vanen
7,92 die Rômær drungen an . in .
7,93 vile manic nôtveste man
7,94 der ich niht genennen kan
7,95 die ez alsô wole dâ tâten
7,96 als die dâ namen hâten
7,97 der herzoge von Pîse
7,98 was . in . gevarn nâch prîse
7,99 gewâfenet grôzlîchen wole
7,100 sîn ors was swarz als ein kole
7,101 mit gerehten marcmâlen
7,102 sîn helm brûnlûter stælin
7,103 mit lîsten wole gezieret
7,104 und vaste gebarbieret
7,105 vûre di ougen . und vûre daz antlitze
7,106 nâch den alten siten spitze
7,107 als sie pflâgen . bî den tagen
7,108 waz solte ich mêr dâr abe sagen
7,109 sîn decke was und sîn kursît
7,110 ein underweben brûn samît
7,111 mit golde deme rôten
7,112 sîn banier was geschrôten
7,113 nâch dem . als er wâfen truoc
7,114 der hêrre wîs . was . und kluoc
7,115 in den rinc quam er gerant
7,116 Prophiliâsen er vant
7,117 ûf einem orse sprûzvale
7,118 den rinc in ein sît zuo tale
7,119 mit sîneme sper wole rîten
7,120 und aber in ander sîten
7,121 wole houwen . mit deme swerte
7,122 den selben prîs . er gerte
7,123 den der helet stæte
7,124 vore . erworben hæte
7,125 mit sîneme sper erwerben nâch
7,126 iedoch hæte . in . ein teil zuo gâch
7,127 ûfe den helet reinen
7,128 und nam daz ors mit beinen

7,129 als iz mohte meist gevarn
7,130 der Rômær . ouch sînen arn
7,131 gegen den vürsten wande
7,132 daz ors mit sporen er manete
7,133 sîn sper er vorne sankte
7,134 daz nie dâr ûz entwankte
7,135 den herzogen von der stat
7,136 stach er . in ein horegewat
7,137 daz im daz antlütze
7,138 belac in der pfütze
7,139 dem vürsten dâ von Pîse
7,140 Prophiliâs der wîse
7,141 zuchte ûf daz sper . dô ez ganz beleip
7,142 ûf sînen geverten er treip
7,143 durch sînes schildes urbor
7,144 der nâch im durch huote vuor
7,145 und stach . in . hinder des orses zagel
7,146 pfile . vile dicker danne . ein hagel
7,147 schuzzen schützen im engegen
7,148 daz sie gevalten den degen
7,149 doch quam er wider âne schaden
7,150 al wær er sêre genuoc verladen
7,151 von Trîpe Dimothêne
7,152 gedâhte dise zwêne
7,153 mit einer tjoste rechen
7,154 daz man von im ouch sprechen
7,155 wole muoste . vore den vrouwen
7,156 und îlte . des . gâhes zouwen
7,157 er hæte guote wâfen an
7,158 und quam wole als ein hövisch man
7,159 gevarn . an des ringes ort
7,160 Prophiliâs vuor ouch vort
7,161 mit einer banier in der hant
7,162 sie tâten beide di ors gemanet
7,163 mit genendigen zorne
7,164 die sper sankten sie vorne
7,165 die viuste sie vaste twungen
7,166 dô di ors zuosamene sprungen
7,167 und trâfen beide einander sich
7,168 der Rômær truoc hôher sînen stich

8,1 “die wâfen uns verrosten
8,2 sô ez nieman læt sich kosten
8,3 die rittere verderben
8,4 die niht in wâfenen werben
8,5 die milten verkargen
8,6 die guoten verargen
8,7 die minnenten verminnen

8,8 daz sie niht tuon beginnen
8,9 und niht der vrouwen ahten
8,10 die sorgær sich vertrahten
8,11 sô sie niht werkes üben
8,12 die vrôgemuoten . trüeben
8,13 die nieman vrôuweden reizet
8,14 sus wirdet daz volc verbeizet
8,15 gelîch den verbeizten trappen
8,16 uns verdörpern die knappen
8,17 die wâren tugent . êr gelârt
8,18 zuht . wirdet . in unzuht . gekârt
8,19 der hōvischheite wirdet . entwonet
8,20 wie sêre sælde von uns vonet
8,21 und unheil unser râmet
8,22 leit . als ein sâme sâmet
8,23 mit iemer wernten smerzen
8,24 in unser aller herzen
8,25 dû ne stirbes niht aleine
8,26 sie sterben algemeine
8,27 mit dir . die ze Athêne sint
8,28 alten . jungen . und die kint
8,29 der aller houbet wære dû
8,30 daz stirbet allensamet nû
8,31 des werde ich niemer wole gemuot”
8,32 er sprach “dû wær ouch alzuo guot
8,33 waz soltes dû sô guot geboren
8,34 sît got sô sêre sînen zorn
8,35 an dir gedâhte erzeigen
8,36 wær al die werlt mîn eigen
8,37 die gæbe ich liebe sun vüre dich
8,38 wær aber daz ich selbe mich
8,39 möhte alsô vüre dich gegeben
8,40 daz dû gesunt soltes leben
8,41 und ich vüre dich erstürbe
8,42 wie gerne ich daz erwürbe
8,43 daz selbe tæte dîn muoter”
8,44 “ei . liebe vater . waz tuot . ir
8,45 daz ir mich toetet êr der zît
8,46 ich weiz wole daz ir riuwic sît
8,47 mînes leides . daz ist mir leit
8,48 und zwivaltet mîn arbeit”
8,49 sprach der wole gemuoter
8,50 “stiuret mîner muoter
8,51 und Alemandînen
8,52 daz sie niuwet pînen
8,53 den lîp . nâch mir . alzuo vile
8,54 und tuot des ich biten wil
8,55 mîn leben ist niht langer

8,56 ich bin eines tôdes swanger
8,57 worden . des muoz ouch ich bekoren
8,58 wende ich durch sterben wart geboren
8,59 dô mân muoter mân genas
8,60 der Rômær Prophiliâs
8,61 der hât mân . entgolten genuoc
8,62 dô man mich . in . die stat truoc
8,63 mit solichem unmuote
8,64 dô wânte die guote
8,65 Cardiones daz ich wære
8,66 Prophiliâs der Rômære
8,67 wende mich sîn geselle truoc
8,68 dô ne was sie leider niht . sô kluoc
8,69 daz sie des konde enthalten sich
8,70 und starp von leiden umbe mich
8,71 von des tôdes übertrite
8,72 nû tuot des ich iuch gebite
8,73 sô mân ougen sich besliezen
8,74 sô lâzet mich des geniezen
8,75 daz ich des nie niht hie zuobrach
8,76 des iuwer munt zuo mir gesprach
8,77 und begêt unse bigraft
8,78 mit vrouwen mit ritterschaft
8,79 nâch rehter küninclîchen guft
8,80 lâzet uns welben eine kluft
8,81 mit edelen marmersteine
8,82 mit golde gemuonet reine
8,83 dâ leget uns beiden samet . in
8,84 wende wir tôt gesellen sîn .
8,85 in alsô rîche serke
8,86 daz man dâ bî wole merke
8,87 daz wir wole adel mohten haben
8,88 mit rôtguldînen buochstaben
8,89 lât unsen namen schrîben
8,90 daz wir alsô belîben
8,91 daz nieman uns zuoscheide
8,92 swenne ir . danne anderweide
8,93 zuo vröuweden . sît gesezzen
8,94 und unser hât vergezzen
8,95 als die lebenden alle tuon
8,96 sô die liute . sich genuoc gemuon
8,97 mit herzelîchen leiden
8,98 sô muoz der lîp doch scheiden
8,99 daz leit . mit lîbes trôste
8,100 wente daz ist rehte daz hôheste
8,101 daz die tôten zuo der erden varn
8,102 wende . in . daz nieman kan bewarn
8,103 die lebenden dâr ûfe sîn

8,104 sô lât . allrêrest werden schîn
8,105 daz ir liep . hætet mînen lîp
8,106 und geltet im sîn liebe wîp
8,107 der sie durch mich hât verloren
8,108 ze wâr . er ist . ir genuoc geboren
8,109 und ist ir biderbe genuoc
8,110 wende die werlt noch nie getruoc
8,111 nôtvestern man zuo degenheit
8,112 und wæne niemer mêt getreit
8,113 die werlt . sîn gelîch ist und noch wirdet
8,114 aber der nihtes . reht entbiret
8,115 nâch sînes lîbes mugenden
8,116 von al erkoren tugenden
8,117 der wirdet noch seltsæne
8,118 der werlt als ich wole wæne
8,119 daz ist mîn hêrr Prophiliâs
8,120 der ist lûterer danne ein glas
8,121 von dem . daz schande ist genamet
8,122 nû gebet im beiden samet
8,123 mîne swester zuo wîbe
8,124 daz von ir zweier lîbe
8,125 geboren noch helde werden
8,126 zuoze erbe diser erden
8,127 daz sie nâch iuvern lîbe
8,128 niht erbelôs belîbe
8,129 sît daz . man mîn entbern muoz”
8,130 er sprach “liebe swester tuo ez
8,131 durch mîner sêle genist
8,132 ob dû mir der gûnstic bist”
8,133 sie sprach . niht . vile hôhes lûtes
8,134 “ich tuo . swaz dû gebiutes
8,135 ob vater unde muoter wil
8,136 die mir gesatzt hân ein zil
8,137 daz ich niht sol übertreten”
8,138 er sprach . “des ich hân gebeten
8,139 des mügen sie dir verhängen
8,140 und dû maht iz vollenbringen
8,141 vile gerne . durch dînes selbes vrumen
8,142 wende ich nie man baz vollenkomen
8,143 an aller slahte tugende
8,144 gesach . von kindes jugende
8,145 der ie sîn swert begurte”
8,146 sie gâben im antwûrte
8,147 sîn vater . und sîn muoter
8,148 “ze wâr . er ist . gar ein guoter
8,149 beide guotes und lîbes
8,150 gert er sicheines wîbes
8,151 zuo nemenne durch sîn jâmer

8,152 sô ne konden wir niht êrsamer
8,153 Alemandînen bestaten”
8,154 “mac sich ez . aber niht gegaten
8,155 sô daz er niht wil wîbes nemen”
8,156 er sprach . “sô lâzet . in . bezemen
8,157 und gebet sie . dem . ir wellet”
8,158 “die rede mir wole gevellet”
8,159 sprach daz sêre klagente wîp
8,160 er sprach . “nû loeset mînen lîp
8,161 ich lige . in grôzer unmaht
8,162 und lât mir ziehen . ûz den schaft
8,163 man geniset grôzer wunden
8,164 daz hân ich dicke ervunden”
8,165 ein arzet was die wîle komen
8,166 der hæte salben vile genomen
8,167 hindene den schaft gekloben
8,168 und dâr . in . wimpelîn geschoben